



Komisija za vanjsku trgovinu i carine
Povjerenstvo za vanjsku trgovinu i carine
Broj: 01/3-50-1-3-23/08
Sarajevo, 22. juli 2008. god.

Комисија за спољну трговину и царине

Z A P I S N I K

**23. sjednice Komisije za vanjsku trgovinu i carine
Predstavničkog doma Parlamentarne skupštine Bosne i Hercegovine,
održane 22. jula 2008. godine**

Sjednica je počela u 14 sati.

Sjednicom je predsjedavala predsjedavajuća Komisije Snježana Rajilić.

Sjednici su prisustvovali članovi Komisije: Jerko Ivanković Lijanović, Mehmed Suljkanović, Slavko Jovičić, Jozo Križanović, Salko Sokolović i Ekrem Ajanović.

Odsustvo su opravdali Šemsudin Mehmedović i Hadži Jovan Mitrović.

Sjednici su, također, prisustvovali: Hajrudin Podbičanin, pomoćnik ministra vanjske trgovine i ekonomskih odnosa BiH, Sonja Abdulovski, stručni saradnik u Komisiji za vanjsku trgovinu i carine, i Emira Češljarić, sekretar Komisije za vanjsku trgovinu i carine.

Za sjednicu Komisije predložen je i jednoglasno usvojen sljedeći

D N E V N I R E D

1. Usvajanje Zapisnika 22. sjednice Komisije,
2. Razmatranje Prijedloga zakona o izmjenama i dopuni Zakona o carinskoj politici Bosne i Hercegovine, predlagača Vijeća ministara BiH, radi dostavljanja Mišljenja Predstavničkom domu, u skladu s članom 104. Poslovnika Predstavničkog doma,
3. Tekuća pitanja.

Ad. 1. Usvajanje Zapisnika 22. sjednice Komisije

Zapisnik 22. sjednice Komisije usvojen je jednoglasno bez primjedbi.

Ad. 2. Razmatranje Prijedloga zakona o izmjenama i dopuni Zakona o carinskoj politici Bosne i Hercegovine, predlagača Vijeća ministara BiH, radi dostavljanja mišljenja Predstavničkom domu, u skladu s članom 104. Poslovnika Predstavničkog doma

Predsjedavajuća Komisije obavijestila je članove Komisije da je Vijeće ministara BiH utvrdilo Prijedlog zakona o izmjenama i dopuni Zakona o carinskoj politici BiH i dostavilo ga, 26.6. 2008., u parlamentarnu proceduru s prijedlogom da se razmatra po osnovnom zakonodavnom postupku.

Na osnovu člana 104. Poslovnika, Komisija za vanjsku trgovinu i carine kao nadležna dužna je razmatrati navedeni zakon i dostaviti mišljenje Predstavničkom domu o principima Prijedloga zakona.

Hajrudin Podbičanin, pomoćnik ministra vanjske trgovine i ekonomskih odnosa BiH, u ime predlagača zakona rekao je da je Ministarstvo sigurnosti BiH, kao nadležno ministarstvo za oblast zaštite i spašavanja, u saradnji s nadležnim organima civilne zaštite entiteta i Brčko Distrikta BiH, sačinilo Prijedlog izmjena i dopune Zakona o carinskoj politici BiH. Osnovni razlog donošenja ovih izmjena i dopuna je sprečavanje budućih požara u BiH kao i neophodnost oslobađanja plaćanja uvozne dažbine za opremu i sredstva za civilnu zaštitu i vatrogastvo. Imajući u vidu da je carinska politika BiH u nadležnosti Ministarstva vanjske trgovine i ekonomskih odnosa BiH, to je zaključkom Vijeće ministara BiH zadužilo MVTEO za provođenje navedenih izmjena i dopune Zakona o carinskoj politici BiH.

U raspravi su učestvovali: Snježana Rajilić, Jozo Križanović i Slavko Jovičić.

Konstatirano je da treba podržati principe Prijedloga zakona. Međutim, otvorena je dilema da li je ovaj prijedlog zakona suviše kasno dostavljen u parlamentarnu proceduru. Naredna sjednica Predstavničkog doma bit će održana 29. jula 2008., kada će se raspravljati o principima Prijedloga zakona. Nakon toga uslijedit će ljetna pauza, tokom koje neće biti zasjedanja Doma. Iz toga proizilazi da bi se ovaj zakon mogao usvojiti najranije na jesen, kada požari ne predstavljaju toliku opasnost. Dogovoreno je da se na sjednici Predstavničkog doma predloži da se, u skladu s članom 106. Poslovnika, nakon rasprave i usvajanja Prijedlogu zakona u prvom čitanju, on razmatra i u drugom čitanju.

Nakon rasprave, u skladu s članom 104. Poslovnika Predstavničkog doma, Komisija za vanjsku trgovinu i carine jednoglasno je prihvatila principe predloženog zakona.

Ad. 3. Tekuća pitanja

a) U okviru ove tačke dnevnog reda predsjedavajuća Komisije upoznala je prisutne o onome što je dogovoreno na sastanku s proizvođačima i prerađivačima duhana, iz oba entiteta, koji je održan na njihovu molbu neposredno prije održavanja 23. sjednice Komisije. Sastanku su prisustvovali: predsjedavajuća Snježana Rajilić, zamjenici predsjedavajuće Jerko Ivanković Lijanović i Mehmed Suljkanović, kao i član Komisije Salko Sokolović. Tema sastanka bila je donošenje Zakona o duhanu i Zakona o izmjenama i dopunama Zakona o akcizama BiH.

U raspravi su učestvovali: Snježana Rajilić, Slavko Jovičić, Jerko Ivanković Lijanović, Jozo Križanović, Mehmed Suljkanović, Salko Sokolović i Ekrem Ajanović.

Konstatirano je da je potrebno jasnije definirati uzgoj i otkup duhana te da postoji potreba donošenja zakona o duhanu, a naročito Zakona o izmjenama i dopunama Zakona o akcizama BiH. Na sastanku je predsjedavajuća Komisije objasnila predstavnici proizvođača duhana ključnu ulogu Upravnog odbora Uprave za indirektno oporezivanje BiH, koji prethodno odlukom treba dati odobrenje o izmjenama indirektnih potreza u šta se ubrajaju i akcize. Predloženo je da se upute zaključci Komisije Vijeću ministara BiH, u pravcu dostavljanja u parlamentarnu proceduru prijedloga navedenih zakona na kojima već rade resorna ministarstva.

Nakon kraće rasprave, Komisija je jednoglasno usvojila sljedeće z a k l j u č k e:

1. Obavezuje se Vijeće ministara BiH da utvrdi Prijedlog zakon o duhanu i Prijedlog zakona o izmjenama i dopunama Zakona o akcizama BiH i uputi ih u parlamentarnu proceduru;
2. Zadužuju se Ministarstvo vanjske trgovine i ekonomskih odnosa BiH i Ministarstvo finansija i trezora BiH da ubrzaju rad na utvrđivanju teksta Prijedloga zakona o duhanu i Prijedloga zakona o izmjenama i dopunama Zakona o akcizama BiH, te izvijeste Komisiju za vanjsku trgovinu i carine u kojoj fazi izrade se nalaze navedeni zakoni te, orijentaciono, koji je rok njihovog upućivanja u parlamentarnu proceduru.

b) Sekretar Komisije obavijestila je prisutne o dopisu sekretara Zajedničke službe kojim se traži dostavljanje plana budžetskih sredstava potrebnih Komisiji za realizaciju međunarodnih aktivnosti u 2009. godini. Podsjetila je da ima nerealiziranih posjeta u 2008. određenim zemljama: Republici Hrvatskoj, Republici Srbiji, Republici Crnoj Gori, Republici Turskoj, Republici Albaniji te Republici Moldaviji. Nakon konsultacija članovi Komisije predložili su iznos od 35.000 KM kao potreban za realizaciju međunarodnih aktivnosti.

Sjednica Komisije za vanjsku trgovinu i carine završena je u 15 sati.

Sekretar Komisije
Emira Češljarić

Predsjedavajuća Komisije
Snježana Rajilić